



Réponse de Madame la Ministre de la Santé à la question parlementaire n° 4900 du 25 août 2021 de Monsieur le Député Jeff Engelen concernant "Délais d'accès à la tomoscintigraphie".

Virop gëllt et z'ënnersträichen datt déi Lëtzebuerger Spideeler net exklusiv u belsch Importer vun Traceur'en gebonnen sinn. Dëst ass just den Fall wann ee spezifeschen Vertrag mat engem belschen Importer besteet. Den Centre National PET (CNP) ass aktuell op Basis vun engem Vertrag deen op een Joer ugesat ass mat engem belschen Importer gebonnen, dëst awer just fir den Traceur Fluor-18. Fir déi aner Zorten vun Traceur'en ginn et keng weider spezifesch Verträge an d'Commanden kënnen direkt op Basis vum Präis an der Disponibilitéit vum Produit vun den Spideeler selwer gemaach ginn.

Iwwerdeems ginn Tomoscintigraphien och mam klasseschen Traceur Tc-99m an deenen verschiddenen Servicer vun der Nuklearmedizin hei am Land duerchgefouert. Dësen Traceur (Tc-99m) gëtt mat Hëllef vun Generatoren, déi een bis zweemol d'Woch (jee no Vertrag) aus der Belsch respektiv aus Holland geliwwert ginn, produzéiert. Dës Molybdene-Generatoren kritt een vun verschiddenen auslänneschen (franséisch an belsch) Firmen ugebueden an et ass momentan keng Penurie bekannt.

Fir déi spezifesch Substanz vum FDG ass an den Kontrakter virgesinn datt am Fall vun enger Penurie, d'Méiglechkeet bestoen bleift sech un aner Fournisseuren ze wenden fir déi néideg Substanz erbäi ze kréien. D'Alternativen fir en aneren Fournisseur deen zum richtegen Zäitpunkt den néidegen Traceur'en zur Verfügung stellen kann sinn awer ganz oft limitéiert, zemoos wëll en Funktioun um europäeschen Marché d'Demande deemno wei generell héich sinn kann. Et ginn am Fall vum FDG franséisch an däitsch Fournisseuren déi kompatibel Produiten zur gläicher Qualitéit ubidde kënnen. Wat déi aner fluor Molekülen ugeet, gëtt et keen aneren Fournisseur op deen zeréck gegräff kéint ginn, an an deem Fall wou d'Substanz net disponibel ass, muss den Délai de livraison effektiv verréckelt ginn. Dat bréngt an deem Fall mat sech datt en Rendez-vous wou d'Injektion vun dësem Traceur virgesinn ass muss verréckelt ginn. Doriwwer eraus ass d'Zaitfenster an där den Traceur genotzt kann ginn och extrem kuerz wëll d'Moleküle den Dag sëlwer wou si produzéiert gëtt och zum Asaz muss kommen. Op Gronn vun der kuerzer Liewensdauer vun dësen Produiten ass et deemno och onméiglech eng national Reserve opzebauen.

Bei den Traceur'en op Basis vun Gallium-68, sinn d'Spideeler net vun den Liwwerungen aus dem Ausland ofhängeg wëll dës hei am Land kënnen produzéiert ginn. Allerdéngs mussen dës Produiten och op hier Qualitéit kontrolléiert ginn an et muss sécher gestallt ginn datt si all déi néideg Critèren erfëllen. Et kann virkommen datt dës Traceur'en refuséiert ginn falls de Produit net den néidegen Critèren entsprécht. An esou engem Fall, muss een e Minimum vun 12 Stonnen ofwaarden, bis een nees den néidegen Gallium-68 huet. Dëst bréngt och nees mat sech datt wann en Rendez-vous fixéiert ass wou eng Injektion virgesinn ass, dësen verréckelt muss ginn.

Eng Collaboratioun zwëschen deenen verschidden Spideeler am Land wou een Spidol deem aneren am Fall vun enger Penurie aushëlleft ass net méiglech wëll d'Akten wou dës Traceur'en zum Asaz kommen exklusiv am Centre National PET duerchgefouert kënnen ginn. Den Gallium-68 kann zu Lëtzebuerg och just am CNP an enger spezifescher Hotte vun der Radiopharmacie hiergestallt ginn. Doriwwer eraus ass och den Austausch mat auslänneschen Spideeler net méiglech wëll et op Gronn vum Risiko deen mat Transport verbonnen ass, verbueden ass radioaktiv Substanzen auszetauschen. Am Noutfall kann ee Patient awer natierlech dës Ënnersichung och am Ausland maachen.